

做醫生

以早，老一輩的人常在咧講的一句話：「第一賣冰，第二做醫生。」意思是講賣冰、做醫生攏是真趁錢的行業。

講著賣冰這款行業，用冰濫糖水，透淡薄仔芳料就賣甲削削叫。冰的原料嘛是水，所以講起來有影是省本閣多利，趁錢若水咧，無人欠數嘛無貨底，好趁甲。佇臺灣這四季如春的好所在，一年至少嘛會當賣欲八個月，有啥物行業比這閣較好趁咧？

共做醫生這種良心事業恰賣冰濫做伙來講，是有小可仔無合軀，干焦是欲說明斯當時醫生這款行業，就是收入懸的頭路爾爾。毋過，時代無全矣，這陣的醫師差不多已經成做醫療勞工矣。

講起咱臺灣醫生的養成制度，佇幾十年來，攏是各大學的醫學院，經過考試競爭，錄取全臺灣成績優秀的高中出業生。經過學校 4 年的校內醫學教育，恰 1 年的見習(clerk)，2 年的實習(Intern)醫生的訓練，通過國家考試，才會當得著醫師執照。若是查埔的，閣著去做兵。了後著愛經過 3-5 年的專科住院醫師(Resident)的訓練過程，若考牢專科醫師的國家考試，才是有牌照的專科醫師。

佇成做專科醫師進前，是一段工時真久、報酬真低的工作過程，時薪可能恰基本工資相當爾爾。差不多著愛到 30 歲的跤兜，正式開始專科醫療的職務以後，才有正式的待遇。此後嘛著閣定期接受訓練恰通過考評，才會使得繼續執行醫療的業務。

時代真正無全矣，自從健保制度實施了後，大部份的醫師，差不多攏已經變成附屬佇大病院、大財團之下，變成醫療勞工矣，所以定定有醫生過勞的代誌發生。這陣做醫生的好處，干焦是較免驚無人欲倩爾爾。

作者：陳憲國

☆詞彙學習☆

【常在】tshiàng-tsai：經常、時常。

【透】thàu：混合之意。

【濫】lām：摻、摻雜，混入。

【跤兜】kha-tau：左右、前後。

【削削叫】siah-siah kiò：有聲有色。

【倩】tshiànn：僱用。

☆文法學習☆

【好趁甲(kah).....】意為非常好賺。閩南語的「甲」字有很多種用途，當做結構助詞時，有「到.....的地步」之意，表示所達到的結果或程度。例如：我的腹肚疼甲欲死。「甲」之後的補語常被省略掉。如：跤痠甲.....；梅仔酸甲.....；好趁甲.....；好額甲.....；好看甲.....；妝甲嬌甲.....等。